

DISSERTATIO MEDICA,
INAUGURALIS,

DE

HEPATITIDE.

QUAM,
ANNUENTE SUMMO NUMINE,
Ex Auctoritate Reverendi admodum Viri,

D. GULIELMI ROBERTSON, S.S. T.P.

ACADEMIÆ EDINBURGENÆ Praefecti;

NEC NON

Amplissimi SENATUS ACADEMICI consensu,
Et nobilissimae FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS AC PRIVILEGIIS
RITE ET LEGITIME CONSEQUENDIS;

Eruditorum examini subjicit

ROBERTUS M^cCAUSLAND,
BRITANNUS.

Ad diem 12. Septembris, hora locoque solitis.

EDINBURGI:
Apud BALFOUR et SMELLIE,
Academiae Typographos.

M,DCC,LXXXVII.

Viro Praestantissimo,

ARENT SCHUYLER DE PEYSTER,

Legionis Regiae (seu Octavae) peditum

Praefecto,

Ob pluria ejus beneficia

Sibi delata,

Hanc dissertationem inauguralem,

Ea, qua par est, observantia,

D. D. Cq.

A U C T O R.

DISSERTATIO MEDICA

INAUGURALIS

DE

HEPATITIDE.

HEPATITIS, five jecinoris inflammatio, aut acuta, aut longa est.

DE HEPATITIDE ACUTA.

DEFINITIO.

“ Pyrexia; hypochondrii dextri tensio et dolor, saepe pungens pleuritici instar, saepius obtusus; dolor ad claviculam et summum humeri dextri; decubitus in sinistrum latus

A

“ diffi-

“ difficilis ; dyspnoea ; tussis sicca ; vomitus ;
“ singultus.” Cullen. Synop. Nosol. Method.
Gen. xvii.

HISTORIA.

Hepatitis acuta cum quodam frigore, alio in aliis, plerumque advenit ; licet enim homo, utpote rei quasi levioris negligens, nil tale animadverterit, attamen postea secum reputans facile recordatur memoriam temporis, quo aër sibi ipsi frigidior solito, dum non sanis item, sentiebatur. Hoc autem frigus calor fugax alternis excipit. Protinus a principiis aeger non solum frigus sentit, sed corpus revera magis friget, quam naturaliter debet ; mox vero, etiamsi frigus adhuc sentiat, reipsa major quam naturalis calor corpori inest. Languor et lassitudo plus minusve opprimunt. Noctu praesertim febris ingravescit, ac somnus per somnia tumultuosus minime reficit. Os, aegro jamprimum expecto, plerumque aret, licet saepe alias sitis parum urget. Dolor quoque, aliquando levis parumque certus, aliquando gravior, hypochondrio

drio dextro insidet. Frequenter hic non, nisi uno et altero die post morbum conceptum praeterito, exoritur, interdum febriculam praecedit. Difficile quidem est omnes singulas hujus doloris conditiones recensere, quippe qui et gradu et loco maxime variet. Aliquando enim gravis, saepius levior; jam acutus et pungens respirationem valde impedit, jam obtusus ponderis magis sensum faceffit; modo in hypochondrio, modo in thorace; modo in dorso, saepius in epigastrio aut scrobiculo cordis, varie, pro varia jecoris parte affecta, excruciat. Saepe in humero sentitur; hepatitidi vero tale indicium abesse interdum expertus credo. Homo plerumque in latus sinistrum aegre decumbit. Si manus, corpore scilicet resupinato, et musculis abdominis remissis, scrobiculo cordis, aut loco infra costarum inferiorum cartilagine admota fuerit, pars pressa dolet. Nonnunquam tumor partium juxta hepar sitarum insignis fit. Dolor aspiratione valida plerumque, tussi semper fere, intenditur. Tussis haud raro adest aut sicca, aut humida. Flavus oculorum et cutis color ab aliquot auctoribus hic memoratur; constat vero hunc saepe abesse. Interdum singultus, interdum vomitus vehementer fatigat. Appetentia cibi plerumque deficit;

deficit; interdum vero haud perinde, atque ex affectu visceris, vitae adeo necessarii, opinione praecipi potuisset. Alvus, ut in aliis hujus generis, frequenter tarda est; diarrhoea vero nonnunquam urget. Pulsus arteriarum saepe durus, validus, plenus, creber; tales autem pulsus conditiones hic frequenter non aequae insignes sunt ac in multis aliis phlegmasiis. Urina plerumque rubra, atque interdum ex ea subsidunt quaedam. Sanguis missus, et jam concretus, semper fere superficiem albidam ostendit. Mens parum alienatur; nisi forsan paulo ante mortem delirium supervenit, aut ex morbo diuturniore moestitia incessit; haec autem saepius hepatitidi longae accedere solet. Facies, initio morbi, haud aliter se habet quam in aliis phlegmasiis, id est, vel parum mutatur, vel tumet ac rubet. Ingravescente autem morbo, eadem macescit, fuscior interdum fit, ut et cutis totius corporis; haec vero saepe vel post morbum longiorem paulum ita variatur.

Febricula, dyspnoea, ac dolor, morbi initio utcunque levia, indies fere augescunt. Denique, raro intra paucos dies desinit; saepe tardius finitur.

DE HEPATITIDE.

DIAGNOSIS.

Morbi, quos hepatitis adeo fortasse referat, ut de discrimine ambigi possit, sunt praecipue pneumonia, gastritis, ac dolores musculorum vicinorum rheumatici.

Pneumoniā aliquando referre videtur, tum ob difficultatem assignandi suam cuique molestiae internae propriam sedem, tum ob hepatis intra costas situm. Hoc enim saepe ad quartam, immo vero ad tertiam usque costam ascendit, praesertim ubi ex morbo valde tumescit. Cum vero partem ejus superiorem inflammatio saepe occupet, nil mirum, si pro hepatitide quidam pneumoniā se vidisse crediderint. Accedit etiam, quod difficultas spirandi, et tussis, tam humida quam sicca, hepatitidem saepe comitantur. Æger in pneumonia aliquando in latus sinistrum decumbere potest, vix unquam in hepatitide. Denique, licet in pneumonia tussis gravior, sputum saepius sanguine mixtum, et difficultas spirandi major, confitendum tamen est, casus incidere, ubi utrum morbus sit pneumonia, an hepatitis,

patitis, haud facile est dictu; neque vero tum decernere multum refert.

Dolor quidem ex jecinoris lobi sinistri inflammatione, isque ex ventriculi eadem ortus, sede fere similes, specie differunt; prior enim gravat, posterior quasi urit. Vomitus non semper in hepatitide, in gastritide semper, adest: Cibi portionesque haud tantum molestiae faceffunt; anxietas denique et debilitas non aeque sentiuntur ac in gastritide, certe phlegmonodea dicta.

Postremo, ubi muscoli latera tegentes, frigore nempe admoto, dolore afficiuntur, tunc morbus a hepatitide plerumque facile distingui potest. Dolor enimvero non adeo certus, motu corporis praecipue excitatur; tactu locus indolescit, ideoque aeger in latus dextrum decumbere non vult.

Haud multum fane periculi est, ne hepatitis acuta malis pyrexia vacantibus non dignoscatur.

Porro autem scriptores nonnulla tradiderunt, quibus pateat, quaenam pars hepatis inflammatione magis laborat.

Cum morbus superiori parti inest, tum singultus, dolor humeri, difficultas respirandi, simul cum lateris dextri dolore acutiore, insigniora esse dicuntur. Si contra inflammatio parti infe-

inferiori insidet, tunc dolor obtusior, vomitus, interdum icterus, quoque adfunt.

EXITUS FREQUENTIORES.

Omnes quidem hepatis mutationes a statu sano, in cadaveribus observatas, inflammatione scilicet praegressa, recensere in animo non est; quippe quod in praesentia minime convenit. Oportet tamen exitus frequentiores proponere.

Resolutio saepe comitatur profluvio aliquo, aut sanguinis, aut bilis, aut sudoris, aut urinae, ex qua defidunt plurima, aut etiam fortasse, ut clar. Cullenus suis in praelectionibus submonere videtur, muci exscreatione.

Hepatitis quoque, ut aliae inflammationes internae, liquore glutinoso ab inflammata superficie exhalato, aliquando finiri creditur; heparque saepe talem per exhalationem vicinis partibus agglutinari satis constat.

Deinde, in suppurationem frequenter desinit, atque, integro etiam abscessu, mortem aliquando infert. Saepius vero pus aliquoversum erumpit, atque vel ex corpore prorsus ejicitur, vel in aliquod

quod ejus cavum effunditur. Ex corpore quidem elabitur aut per tracheam, pulmonibus et hepate septo transverso conglutinati, excretum: Aut per intestina, exitu nempe in ductus bilia-
rios sibi met comparato, abscessusve parietibus cum intestinis concrecentibus, atque ibidem foramine facto: Aut etiam per ventriculum, jecore ab inflammatione praecedente ei adhaerenti. Denique, foras prorumpit, concretionem inter abdominis parietes atque hepar antea effecta. Cava, in quae pus ex abscessu profluere potest, sunt faccus pericardii, pleurae alteruter, vel faccus peritonaei. In cavum abdominis effusum, ibique aliquamdiu commorans, intestina nonnunquam erodit, atque ita per anum ejicitur. Denique, pus aliquando, ut fertur, venam cavam inferiorem aut venas cavae hepaticae erodit, atque in sanguinem effunditur: Forte etiam per metastasin ad alia loca corporis deponi poterit, et vario quidem eventu, pro diversitate partis, quam occupat.

Tempus morbi, quo fit suppuratio, pro gradu inflammationis, aegri temperamento, ratione curationis, necnon pro natura coeli ac tempestatis, multum variat. Enimvero suppurationis indicia neque certa neque semper manifesta sunt. Do-
lòr

lor imminutus, idemve ex acuto pulsans factus; sensus gravitatis in regione hypochondrii dextri, praesertim ubi aeger in latus sinistrum recumbit; fluctuatio in nonnullis casibus; horrores; accessiones febris majores, eademque vesperi repetentes; rubor genarum circumscriptior; haec sunt, omnium consensu, inter indicia supurationis minus fallacia.

Denique, hepatitis in gangraenam transire potest; rarius autem fortasse quam nonnullae aliae inflammationes.

Postremo, saepe etiam in scirrhum abire dicitur. Cum vero aliquot clarissimi scriptores dubitant, an schirrus jure inter inflammationis exitus enumerari possit, de re adeo incerta hic differere non expedit.

Variae quidem sunt species, quas hepar hoc vitio affectum cadavera inspicientibus offert: Quando autem iis cum praegressi morbi molestiis raro intercedit tanta necessitudo, ut huic illive jecoris conditioni sua respondeant propria indicia, istas hic memorare non operae pretium fore arbitror.

Facta jam hepatitidis acutae quasi adumbratione, superest ut quaedam de longa adjiciantur.

Satis quidem constat, jecur saepe inflammatione laborare, ubi nulla talis morbi indicia ante mortem extiterunt. Haud vero negandum est, signa hepatis hoc modo affecti, licet interdum ambigua et parum conspicua, saepe deprehendi posse.

Ex propria experientia compertum habeo, quod hepatitis longa pluribus dyspepsiam aliquando simulat; mihi met enim ipsi, aliquot ante annis in Americae Septentrionalis parte degenti, talis similitudo, morbo nimirum incipiente, semel errorem attulit. Multos equidem aegros vidi, quibus jecur affectum esse minime dubitabam, licet eos dyspepsia tantum aut diarrhoea tentari facile credi potuisset. Neque enim pauca sunt signa, quae in hujusmodi errorem inducere valeant; nam aeger saepe tantummodo de dolore, falso, quem ventriculi vocat, nec gravi nec constanti conqueritur, et alioquin vix male se habere affirmat; ructus dolorem subleuat; aër, cibus intendunt, quippe quae hepar, ventriculo distento, comprimunt, et partes vicinas tendunt.

Experientia sane edoctus, quatuor praecipue omnium indiciis crediderim. Si partes juxta scrobiculum cordis atque epigastrium tactu dolore

lorem excitabant; si, crescente morbo, aliquid caloris noctu existeret; si sanguis missus (eo nempe consilio, ut quid certius appareret) et jam concretus, superficiem albidam ostendebat; si aeger quid levamenti ex sanguine detracto experiebatur, tum demum jecoris inflammationem adesse verisimillimum mihi visum est. Hic autem admonere oportet, quod hepatis inflammationes, cum acutas, tum longas, esse in regione supra dicta admodum frequentes videbam; idque non tantum ex aegris vivis, sed etiam ex cadaveribus compluribus incisis, explorate perceptum est. Quoniam vero instituti ratio opusculi plura referre de hac re prohibet, in praesentia satis sit dicere, quod ibi et calor aestatis et frigus hiemale multo majora sunt quam in Britannia, tempestatesque adeo inaequales, ut aliquando thermometer intra quatuordecim dierum spatium a gradu 95 ad 44 mutetur.

De Indiae Orientalis hepatitide nihil certi habeo, quod dicam, quippe quia historiam ejus plenam atque accuratam frustra adhuc quaesivi. Videtur autem esse modo acuta, eaque comitata nonnunquam diris cruciatibus, modo longa.

CAUSÆ REMOTÆ.

A clar. Culleno primo memoratur vis externa hepatis regioni illata. Ubi, verbi causa, aliquis ex alto deciderit, hepati, utpote visceri et pendulo et ponderoso, semper fere maximus fiat concussus necesse est. Immo etiam injuria capitis, in primis qua calvaria vel findatur, vel medium desidat, nonnunquam huic vitio locum dedit. Deinde recensentur quaedam animi perturbationes, ira praecipue; calor aestatis fervidus; corporis exercitatio vehementior; febres remittentes atque intermittentes; frigus corpori externo, praesertim in hepatis vicinia, admotum, aut aqua frigida ingesta, quorum vero alterutrum homini jam calenti magis nocet; materies varii generis, tam solida quam fluida, in jecore collecta; inflammatio denique ipsius visceris vetusta. Postremo, nonnulli his usum liquoris spirituosi immodicum annumerant.

CAUSA PROXIMA.

Hepatitis eidem, atque aliae inflammationes, causae proximae deberi videtur, vasorum scilicet partis motui adaucto, necnon spasmō extrema eorum vexanti. De morbi sede inter medicos parum convenit; alii enim credunt, modo hepatis substantiam, modo ejus membranam affici, docentque quomodo vitium alterum ab altero dignosci queat. Alii autem putant, priorem semper, nisi in hepatitide longa, vitio vacare.

Enimvero, cum partes ipsae non, nisi post morbum graviolem, ubi inflammatio jam late se diffuderit, inspicī possunt, nil mirum si de hac re ambigitur.

Fabrica porro hepatis dissensionem occasionem aperuit. Quoniam profecto sanguis, qui in hoc viscus influit, partim vena, partim arteria, vehatur, dubium est, utri malum potius infideat.

Hac quidem de re disputare in animo non est; quia tum celeberrimi ex recentioribus opiniones ex toto diversas proponunt, tum res ipsa ad medicinae praxin parum spectare videtur.

Caeterum

Caeterum satis constat, hepatitidem aliquatenus differre ab aliis inflammationibus; hae enim omnes locis frigidioribus, hieme aut vere maxime grassantur, illa vero calore fervido ac diuturno saepe inducitur. Hydrargyrus deinde, qui in aliis nocere videtur, in hepatitide saepe est praestantissimum remedium. Denique, Culenus sua pro sagaci inquisitione quaestionem attulit, an calor, bilis nempe et copiam adaugens, et indolem mutans, hoc malum invehere potest?

EXPLICATIO SIGNORUM ALIQUOT.

Dolor.—Hic, ut jam dictum est, pro jecoris parte affecta multum variat; plerumque autem in hypochondrio dextro sentitur.

Acrior fit, aegro in latus sinistrum decumbente, vel ob jecoris pondus ipsum lateri dextro adhaerentis, vel ob ejusdem pondus ligamentum dextrum intendens. Quoniam vero ligamentum ipsum inflammatione saepius laborat, utpote quod peritonaeo hepar tegenti continens, ejus intensio dolorem necessario excitabit. Deinde,
aegro

aegro in latus dextrum decumbente, hepar per superficiem amplam aequaliter omnino fulcitur; ideoque pondus suum nullam unam partem magis alia intendit. Dolor etiam summum humerum aliquando occupat, id quod nonnulli ex nervi tertii cervicalis distributione oriri putant; constat vero, talem nervorum nexum sine ullo sensus consortio toto in corpore deprehendi; contra quoque magnum saepe, ubi nexus nervorum non adest, sensus consortium valet. Porro autem septum transversum aliquando inflammatione afficitur, aut in se orta, aut a pulmonibus illata, idque dolore humeri absente. Enimvero membranarum magis quam nervorum nex-
us sensum partibus remotis facessere videtur; atque multa sunt exempla, ubi dolor hoc modo facessitus tantummodo in membranae extremitate sentitur. Dolorem itaque hoc in casu ex hepate et septo transverso per mediastinum usque ad humerum pervenire simile vero videtur; hic autem nihil constitui potest, quod non incurrat in aliquam difficultatem.

Dyspnoea.—Initio morbi dyspnoea raro gravis est; aucta vero hepatis mole, plerumque plus minusve aegrum infestat, impedito scilicet septi transversi

transversi descensu; adeo quo magis aspiratio deficiat, eo respiratio fiat crebrior necesse est.

Tussis.—Omnis fere corporis status, qui respirationi obstat, tussim tandem movet. Irritatio quoque pulmonibus ex hepate illata idem facit.

Singultus.—Ab irritatione aut septi transversi, aut ventriculi, singultus oriri potest.

Icterus.—Inflammatiō in hepatis inferioris superficie orta, interdum usque ad ductus bilem vehentes tendit, ibique hujus exitu inhibito icterum infert.

P R O G N O S I S.

Haec quidem praecipue pendet a natura causae remotae, priore corporis statu, natura denique et gradu ipsius morbi.

Hepatitis profecto acuta, quae ex diuturna nascitur, plerumque periculosior est. Deinde, ubi corpori jam alio morbo debilitato supervenit, plurimum mali instat. Æger, cui temperamentum sit melancholicum, hoc malo saepe vincitur. Magna quidem pyrexia nunquam leviter terrere nos debet.

Pulsus

Pulsus arteriarum debilior, frequens autem et durus, fitis ingens, dolor nihil diminutus, vires decedere, inflammationem vero vigere indicant. Dolor denique magnus, five acutus, five obtusus, corpori gravitatem atque anxietatem animo faciens; tussis et dyspnoea vexantes; sanguis aliquoties jam missus, crustam densam, crassam, resilientem, cum feri maiore portione usque ostendens, nunquam non metuenda sunt.

RATIO MEDENDI.

Consilia, quibus huic vitio succurritur, ad tria redigi possunt. Primum nempe est, quo sanguinis impetus toto in corpore, praecipue autem hepate, nimis auctus diminuitur; alterum, quod spasmus vasorum extremorum discutit; tertium denique, quo quaedam gravius urgentia alleventur.

Horum quidem primo regimen antiphlogisticum, sanguinis detractio, alvum solventia, necnon quaecunque sedantia refrigerant, satis commode conveniunt.

Regimen antiphlogisticum.—Alia fane sunt, quibus stimulantibus corpus tam sanum quam aegrum plerumque expositum est; alia quoque, ex morbo ipso genita, quae vice sua fiunt causae, malumque, unde profluxerunt, adaugent. Quae ambo genera evitare est regimen antiphlogisticum; quod, licet morbum ex toto tollere nequeat, eum certe leviores reddit, favetque decessioni.

Prioris ordinis sunt omnia extrinsecus admota sensibus, ut lux, strepitus, calor aut externus, aut ejus, qui corpore ipso gignitur, congestus; exercitatio, ipsa etiam actio musculorum ad statum corporis erectum necessaria; cibus, carnis praesertim, vel falsus, vel acer; inquieta denique cogitatio.

Posterioris autem sitis, stercus congestum, acrimonia humorum ex calore aucto defectuque alimenti orta.

Priora evitare sat erit; posteriora quam primum diluentibus subacidis affatim ingestis, clystims emollientibus, necnon medicamentis alvum solventibus, tollenda sunt.

Sanguinis detractio.—Cum validior vasorum actio multum ab distensione pendeat, sanguinis detractio plerumque inflammationem minuire

ere in promptu est. Ex aetate vero, sexu, mole ac robore corporis, temperamento, vitae genere, regione ac tempore anni, natura causae remotae, die morbi, diathesi phlogistica, sanguinis jam extracti specie, et levamento inde experto, his omnibus rite perpenſis, ſtatuendum eſt, quantum mitti expediat. Quibus id quoque accedere poteſt, quod in hepatitide, quamvis aliquando largam ſanguinis miſſionem poſtulante, ſaepius minor, quam in pneumonia, et quibus aliis phlegmaſiis, commode reſpondet. Cujus quidem ratio fortasſe ex eo petenda eſt, quod motus ſanguinis in hoc viſcere, ob peculiarem ſcilicet ejus fabricam, multo languidior eſt quam in aliis corporis partibus, pulmonibus praefertim.

Permagni, ut in aliis phlegmaſiis, reſert, ſanguinem primo quoque tempore mitti; namque inflammationis commoratio, etſi ſuppurationem non adhuc induxerit, tamen mutationem in partis ſtructure ſemper efficit, quae morbi reſolutioni non poteſt non obſtare. Ubi autem tantum ſanguinis e brachio miſſum fuerit, quantum vires aegri ſinant, et pyrexia poſtulare videatur, poſtea ſanguinem etiam de vicinis partibus, ſcarificatione nempe et cucurbitulis, demi nonnunquam prodeſt.

Album

Alvum solventia.—Talia certe in hepatitide melius proficiunt quam in pneumonia, quippe quia ex partibus jecori vicinis humorem evocant. Exinanitionem quoque corporis generalem praestant, eoque actionem vasorum immodicam minuunt. Irritationem denique ortam acrimonia et distensione, iisque ipsis ex stercore diutius retento genitis, tollunt. Porro autem aqua tepida clysteribus infusa saepe multum adjuvat, utpote quae intestina fovet ac humectat, eoque motus inordinatos in partibus etiam remotis, per consortium scilicet illud mirabile, quod intestinis toto cum corpore intercedit, prohibet; idque multo magis in hepate, quod colo tam propinquum est.

Medicamenta denique alvum solventia in huiusmodi casu ex salibus mediis praecipue eligi debent, quia talia non tantum effectus jam memoratos exhibent, sed corpus aliquatenus refrigerant.

Sedantia.—Quae horum ad pyrexiam maxime faciunt, sunt frigus, acida, et aliqua de salibus mediis.

Frigus, licet in pyrexiiis quibusdam remedium sit praesentissimum, tamen in phlegmasiarum ordine raro auxiliatur; et plerumque abunde est calorem

calorem sedulo evitare: Cum vero de ea re jam diximus, hic pluribus nihil opus est.

Acida, praecipue ex vegetabilibus desumpta, et potu mixta, corpus refrigerant, et grata sunt, sitim sedant, atque acrimoniam putrem arcent corriguntque. Ex salibus mediis refrigerantibus nitrum fortasse efficacissimum est. Sal denique ex acido vegetabili atque alkali fixo confectus haud raro adjuvat.

Deinde ad spasmos vasorum extremorum discutiendos pertinent fomenta calida, vesicatoria, necnon quaecunque exhalationem per cutem promovent.

Fomenta calida hepatis regioni admota, utpote quae cutem humectant, resolvunt, sensumque excitant gratum, saepe nonnihil proficiunt. Hic autem omnino cavendum est, ne corpus frigori pateat, neu vestimenta aut stragula sint humida, neu fomenta ipsa nimis calida adhibeantur.

Vesicatoria.—Ubi morbus satis mitis est, aut, secundum praecepta jam tradita, larga sanguinis detractio minime convenit, statim post sanguinem semel missum vesicatorium regioni hepatis admovendum est. Ubi autem morbus est gravior, conditionesque flagitant ut sanguis copiose mittatur, tunc vesicatorium non nisi post alteram missionem

missionem admoveri debet. Quoniam vero hepatitis plerumque aliis phlegmasiis diuturnior est, vesicatorium idcirco iterum atque iterum adhiberi saepe oportet; cum eo tamen, ut semper in partem jecinori vicinam imponatur.

Medicamenta exhalationem per cutem promoventia.—Haec sunt vel diluentia, vel sales medii, vel vomitoria parvis adeo ponderibus ingesta, ut nauseam tantummodo moveant.

De diluentibus ac salibus mediis jam dictum est. Ex vomitoriis tartarus emeticus fortasse est efficacissimus, atque usui aptissimus. Illud autem ignorari non oportet, vomitionem in hoc morbo nunquam periculo vacare, quippe quae tum hepar comprimit et contundit, tum sanguinis cursum in vena portarum maxime auget. Cum igitur medicamenta hujusmodi vel parvo pondere adhibita, vomitum, nolente medico, aliquando excitant, satis constat, ea rarius esse danda. Denique, sudorem elicere per medicamenta calefacientia et calorem nunquam licet; imo etiam, nisi sudor toto ex corpore sua sponte proruperit, atque aliquid levamenti afferat, eum promoveri raro expedit.

Postremo votum est, ut quaedam gravius urgentia alleventur.

Horum

Horum praecipua sunt vomitus et singultus, quae eandem fere curationem postulant. Opium devoratum ea aliquando inhibet. Quoniam vero hoc effectus plerumque exigui temporis praestat, ac diathesin phlogisticam semper fere auget, omnino nunquam eo, nisi malo flagitante, tali modo utendum est. Atqui in intestinum rectum ex inferiore parte inditum minus nocere, suumque etiam sedandi effectum exhibere, dicitur. Opium deinde atque aromata super cordis scrobiculo, epithematis instar imposita, interdum ad idem faciunt. Denique per vesicatorium eidem parti admotum frequenter satis commode proficitur.

Neque vero hydrargyrus silentio praetereundus est. Hic certe, praecipue illitus, in India Orientali ab omnibus valentissimus adversus hepatitidem celebratur; eundemque profecto in regionibus haud aequae fervidis saepe quam commodissime respondere egomet expertus testor. Ubi sanguinem frequentius mitti haudquaquam conveniebat, atque vesicatoria saepe adhibita minus auxiliabantur, ideoque morbus, etsi non paulum levatus, haud raro magna ex parte remanebat, tum denique hydrargyrus admotus effec-

tus

tus mirificos brevi plerumque praestitit, multosque ad sanitatem veram perduxit.

Verum enimvero, hunc ipsum aegris robustis, etiam post exinanitiones haud parvas, vigente adhuc diathesi phlogistica, aliquoties nocuisse ex usu compertum habeo.

F I N I S.